




Etorkin batzuek lan egiteko kontratuak zituzten.

EFE

Hogei izan daitezke Espainian sartzerakoan hildako etorkinak

ALMERIA

Erreskate taldeek ez dute Almeriako kostaldean ito zitezkeen magrebiarren hilotzik aurkitu, eta oraingoz bi besterik ez dira Espainian legez kanpo sartzeko saioan hildako etorkinak. Hala ere, 'El Pais' egunkariak hogei hildako inguru izan zitezkeela zioen atzo, magrebiarrak ekartzen zituen itsasontziko bidaiari baten datuak aipatuz. Poliziak eta Goardia Zibilak ez du lurrera iritsitako etorkin gehiago atzeman. Iturri ofizialen arabera, 200 edo 300 magrebiar inguru iritsi ziren Almeriako kostaldara.

Bitartean, El Ejidoko mediku forntseak herenegun aurkitutako bi gorpuen autopsia egin zuen atzo, oraingo heriotzaren arrazoiak jakitera eman ez dituen arren. Almeriako kostaldeko inguru horretan daude oraingo Goardia Zibilak atxilotutako 110 magrebiarrak. Atxilotutakoan artean, bi emakume aurkitu dituzte lehen aldiz. Goardia Zibilak zenbait arropa eta janaria eman die legez kanpoko etorkinei, eta datozen orduetan beraien jatorrietara —Ma-

rrokko batipat— itzultzeko neurriak hartzen ari direla jakin erazi dute.

ITSASONTZIKO SOTOAN ITORIK

Hamabi metroko luzerako itsasontzian atera ziren Nadorreko (Marrokko) portutik Espainiara agiritik gabe sartu nahi zuten 250en bat etorkin. Beste 50 txalupa txikitik abiatu ziren Almeriarantz. Magrebiarrak bata bestearen gainean pilaturik zeuden itsasontziko sotoetan. Hori dela eta, Nadorretik atera bezain pronto zortzi gizon eta emakume bat ito egin ziren eta kareletik bota zituzten, Andaluziara iristea lortu zuen batek adierazi zuenez. Bidaian zehar beste hamarren bat bota zituztela ziurtatu zuen bidaiari berak.

Espainiak etorkinei atek itxi zizkientetik, Goardia Zibilak gau eta egun zaintzen ditu Cádiz eta Malagako kostaldeak. Hori dela eta, orain Almeriako kosta bakartia hautatzen dute baimenik gabe Espainian sartu eta lan egin nahi duten magrebiarrak. Bidaia hau besteak baino luzeagoa da, ehun bat milia, baina kostazainak topatzeko aukerak gutxi dago.

Oposizioak zentsura mozioa aurkeztu du Cressonen gobernuaren aurka

Habash auzia aprobeixatu nahi izan dute sozialistak kanporatzeko

Frantziako Legebiltzarreko zentru eta eskuineko alderdiek zentsura mozioa aurkeztu zuten atzo Edith Cressonen gobernuaren aurka, Habash auzian egindakoa salatzen asmoz. Cresson lehen ministroak ez zuen erantzukizuna bere gain hartu eta hortaz asteartean eztabaidatuko dute asanbladan.

PARISE

François Mitterrand lehendakariak astelehenean iragarri zuen moduan, eskuin eta zentruko hiru alderdiek —Chiracen RPR, Giscarden UDF eta Barrieren UDC— zentsura mozioa aurkeztu zuten atzo Edith Cressonek Habash auziari buruzko azalpenak eman ondoren.

Cressonen azalpenen ondoren izandako debatan Eduard Balladur (RPR), François Leotard (UDF) eta Jacques Parrotek (UDC) Gobernuaren dimisioa eskatu zuten, George Habash Palestinako Askapenerako Herri Fronteko (PAHF) buruari Frantziaren sartzen uzteagatik eta ondoren «sozialistek erakutsitako kontrol ezagatik». Alderdi Sozialistaren aldetik, Laurent Fabius idazkari nagusi berriari egokitu zitzaion lehen ministroa defendatzea.

Asteartean bozkatu behar den zentsura mozioak aukera urriak ditu aurrera egiteko. Eskuindarrek 264 boto besterik ez dituzte biltzen eta Gobernu botatzeko 289 dira beharrezkoak. Kopuru horretara iristeko PCFren laguntza edo Habash aferan Gobernuarekin haserretutako dipu-



Edith Cressonek Habash auziaren nondik norakoak azaldu zituen.

AP

tatu sozialisten laguntza behar dute. Komunistek abstenitu egingo direla iragarri zuten atzo eta bigarren aukera ia bazterturik dago.

Bestalde, Georgina Dufoixek utzi egin zuen atzo Frantziako Gurutze Gorriaren lehendakaritza, joan den astelehenean iragarri zuen moduan.

DELORS ONDO INKESTETAN

Azkenaldian ugaltu egin dira frantziarren boto asmoei buruzko inkestak eta denek sozialisten hondamena eta eskuindarren garaipena aipatzen dute. Le Point astekariak kaleratutakoaren arabera, UDF eta RPRko hautagaiek botoen % 39 eskuratuko lituzkete, PSk % 20, Front Nationalek % 16 eta PCFK % 8. Bi alderdi ekologistek —Les Verts eta Generation Ecologie— % 17 lortuko lituzkete.

✓ Aukera urriak ditu zentsura mozioak aurrera egiteko, dagoeneko komunistek aurka egingo dutela iragarri bait dute.

Le Pointen inkestak datu interesgarria erakusten du lehendakarietarako hauteskunderi buruzko inkestetan. Gaur egingo balira, eta PSren hautagaia Michel Rocard balitz, lehendakaritza eskuindarrentzat izango litzateke —Chirac zein Giscard—. Baina hautagai sozialista Jacques Delors izango balitza, gauzak erabat aldatzen dira, Europako Komisioko egungo lehendakariak bi eskuindarrak garaituko lituzkeelako.

Frantzia prest dago armamentu nuklearrari buruzko negoziazioetan parte hartzeko

PARISE

Frantziak bat egingo du Estatu Batuak eta Errusiak armamentua murrizteko hasitako negoziazioekin, «elkarrikeria hauek nahikoa aurreratzen dutenean» atzo François Mitterrand lehendakariak iragarri zuenez. Arma nuklearrak gutxitzeko prest agertu zen arren, Mitterrandek Frantziaren politika nuklearra berretsi egin zuen, «beste herrialdeek eraso egin ez diezaiguten beharrezkoak diren arma nuklear guztiak izango ditugu» hain zuzen ere.

Boris Ieltsin errusiar lehendakariarekin batera emandako prentsaurrekoan esan zuenez, «bi potentziak armak gutxitzeko egutegia erabaki eta gutxitze horiek aurreraturik izandakoan, Frantzia negoziatzen hasiko da». Errusia eta Estatu Batuek «arloan honetan egindako aurrerapausuei esker», Frantziak bere programa nuklearrak «biguntzeko» aukera izan du jadanik.

Ieltsinek Frantziako Gobernuaren jarrera ulertzen eta errespetatzen



François Mitterrand.

zuela adierazi zuen, eta «gaur egun Frantzia eta Errusiaren arma nuklearraren kopurua konparazina» dela onartu zuen. Lehendakari errusiarren duen desarme proposamena azaldu zuen berriz ere. Horren arabera, Soviet Batasuna ohian eta gaur egun Estatu Independienteen Komunitatean arma nuklearrak dituzten

lau errepublikek —Errusia, Ukraina, Bielorrusia eta Kazakhstan— 12.500 buru nuklear izatek, 2.500 izatera igaroko dira.

Frantziara egindako bisitaldiaren laburpenean, bi herrialdeen artean «inolako arazorik ez dagoela» ziurtatu zuen Ieltsinek. Frantziako agintariekin sinatutako akordio guztiak —'Frantzia eta Errusiaren arteko Hitzarmena' beste batzuren artean— betekoa zituela iragarri zuen.

Kredituei dagokienaz, iaz Frantziak SESBerri emandako gehienak Errusiara joatea lortu du Ieltsinek. Horretaz gain, Gobernu frantziarrak 4.000 milioi liberako (80.000 milioi pezeta inguru) beste mailegu bat eman dio Errusiari.

Bigarren aldia da Boris Ieltsinek Frantziara bisitaldi ofiziala egiten duena. Aurrekoa errusiar Legebiltzarreko lehendakari zenean egin zuen eta Frantziako agintariekin arreta gutxi egin ziotela aipatu zen. Honako honetan, ordea, oso gutxitan ikusten diren protokolo neurriak hartu zituen Mitterrandek.

Soldadu bat espetxeratu dute «Espainia iraintzeagatik»

ARRECIFE

Arrecifeko (Lanzarote uhartera) koartelean soldadutza betetzen ari zen gazte bat atxilotu eta gartzeleratu egin zuten atzo, «Espainia, bandera eta bere sinboloak publikoki iraindu zituelako». Miguel P.L. 21 urteko gaztea Lanzaroteko Tahiche gartzelara dago atzodanik iturri judizialek jakin erazi zuten.

Miguel P.L. Arrecifeko taberna batean zegoen uniforme jantzita

zuela eta bere lagun batekin, Espainia eta bere banderaren aurkako «irainak» oihukatzen hasi zenean. Bertatik pasatzen ziren bi polizia, oihuak entzun eta atxilotu egin zuten. Epailearengana eramanez ondoren, honek gaztea espetxeratzea erabaki zuen militar izaera kendu eta gero.

Hala ere, datozen orduetan Miguel P.L. aske utzi dezaketela adierazi dute iturri berberak «ustezko delitua egin zuen unean erabat mozkorturik zegoelako».